

# Regurdanzas rumantschas da la Segunda Guerra mundiala

■ (rtr) **Avant 70 onns è la pli sanguinusa guerra da la carstgaunadad ida a fin en l'Europa: quai suentar la capitulaziun da la Germania ils 8 da matg 1945. Ed era sche populaziun svizra n'è betg stada involvida en la Segunda Guerra mundiala, las consequenzas ha era ella senti – era qua en il Grischun.** Far il pur senza il bab ch'è a militar, esser a militar durant che l'Europa è en guerra, pronta da spender e gidar schuldads blessads e tadlar ils quitads dals schuldads franzos e polacs internads en il Grischun. Quatter Rumantschs raquintan quatter pitschnas istorgias or da lur vita durant la Segunda Guerra mundiala.

## Tona Collet (86)

*Tona Collet* era cun ses bab, sia sora ed il tat ad acla cura ch'il bab è vegnì clamà la fin d'avust 1939 tuttenina a militar. En sasez prunts da segar, han els lura stuì far tut persuls, senza il bab, las lavurs. Sco blers auters umens en il Grischun è uschia il bab da Tona Collet stà dad in di a l'auter davent da chasa, da la famiglia, dal puesser e da las lavurs che spetgavan.

## Luis Bundi (94)

*Luis Bundi* da Curaglia è stà a militar durant la Segunda Guerra mundiala. Defender la patria da l'inimi n'ha el bain mai stuì, star guardia e marschar d'in lieu a l'auter per

cas che l'inimi avess da vegnir, gliez ha er el stuì. Ed uschia n'ha quai betg mo dà lungs dis e lungas notgs cun star guardia, mabain er ina u l'autra vaschia cun marschar.

## Elisabeth Brunner (92)

*Elisabeth Brunner* sa regorda anc oz, pass 70 onns suentar, adina puspè gugent vi dal temp communabel cun ils schuldads franzos e polacs ch'eran internads en il hotel da ses geniturs a Domat. Bun contact ha ella cunzunt gì cun ils schuldads franzos ch'han tranter auter er raquintà ad ella da la guerra en l'Europa.

## Marcella Maier (94)

*Marcella Maier* ha, sco pliras millis autras dunnas era, sustegnì la Svizra durant la Segunda Guerra mundiala tranter auter er cun far servetsch auxiliar da dunnas. In servetsch voluntari nua che las dunnas svizras han gidà per exempel il militar en l'administraziun, en cuschina, tar il transport u era tar la sanitad, sco quai che Marcella Maier ha fatg.

Dapli infurmaziuns davart il servetsch auxiliar da dunnas, ils purs da muntogna, ils internads en Svizra ed ils exercizis da schuldads svizzers durant la Segunda Guerra mundial pudais Vus guardar en ina selezziun da la «Schweizer Filmwochenschau».